



豆腐伯姆

人講：「半夜想該千條路，天光本本磨豆腐。」豆腐伯姆斯無恁花螺心，佢係——入夜一覺天曙光，伶俐鑊滾豆乳香。噴香个豆乳煮好，點石膏、攤板帕、入枋模，黏時就變做一大坭白雪雪个靚豆腐了。

梳一隻亮(lang)線潔節个髻髻花、著一身淨俐線斗个大衿衫，兩隻搓到白淨个菜籃肚各兩枋錫人个豆腐、一疊洗到晨光个枸薑葉、一抓絲好拈正个枸薑莖絲，福相福相、開容笑面个豆腐伯姆拿起擔竿，上街路了。

「買豆腐哦！買豆腐哦！」

豆腐伯姆還冒開賣。係洗等嘴面个細姪仔，影著豆腐伯姆个身裝仔，嘴肚還哼等牙膏波就遽遽出聲通報屋下人，再煞煞湯嘴、洗手面，入灶下擎盤買豆腐了。大人細子拿等屋下个盤碗，一儕儕開大門、過大路，遽腳板行過來。莊頂人聽著聲哨也遽手回等錢迎下來。

「阿凱，紮鼻了？有好分爺哀使嘴了，還乖哦！來，兜好、定定仔行哦。」豆腐伯姆牽起阿凱仔个手，撈一盤豆腐實疊放在厥手面，看等新制服个背影歡喜行轉屋面前，正安心掠(liag)起下一手豆腐。四方八面行來散去个身影、東片析正跣床个日頭、豆腐伯姆安定个笑容、賁文个聲線，豆腐枋頂一條條決裁个線路，莊下溫溫个人情線在打早開賣。

兩皮枸薑葉十字交層、放豆腐、葉頭尾拈起摺一下佢、用莖絲索綯好，莊頂人攞等豆腐也歡喜轉屋。放入盤肚、還溫燒个豆腐，淋一息仔豆油：豆腐錫出豆油个香味、甜味；豆油吊出豆腐个豆香、清甜——嗯！篤實、甜香，幸福个味緒。

豆腐伯姆係好命婆：子孫賢孝、屋場闊闊，身體砸礮、手腳生活。逐日煞猛做豆腐、腳步定疊挨上街路、頭腦靈通做到八十零，賣一份康健、做一份捨毋得个人情。還燒燒、醃醃豆香个雪白豆腐，有清香、色水青亮(liong)个枸薑葉相隨。兩隻菜籃、一支擔竿，福相个身形、淨俐个大衿衫，豆腐伯姆个笑容，還留在擎盤買豆腐个細姪仔心肝肚，都毋會消散。

作者：彭瑞珠

☆詞彙學習☆

【線斗】xien deu`：整潔亮麗。

【回等】ngiab` den`：緊捏著，藏著。

【一抓】id` za`：一把。

【紮鼻】kien pi：牛穿鼻，比喻小孩入學。

【哼等牙膏波】bud den` nga` gau` po`：冒著牙膏泡。

【賁文】pun` vun`：厚實溫文。

【手腳生活】su` giog` sen` fad：手腳靈活。

☆文法學習☆

【兩皮枸薑葉】liong` pi` gieu` giong` iab：兩片月桃葉。量詞「皮」，是計算花瓣、樹葉等片狀物體的單位。

例1：這皮樹葉仔，還靚哦。（這片樹葉，好漂亮啊。）

例2：該兩皮筍乾，拿來炆肥湯，異好食。（那兩片筍乾，拿來與油湯一起燉煮，很好吃。）